

Սիրելի հայրենակիցներ,

Շուրջ մէկ ամիս է արդէն, որ դպրոցները բացած են իրենց դռները, հիւրընկալելով մեր երեխաները. վերամուտի գեղեցիկ մթնոլորտ կը տիրէ ամէնուրեք: «Լրատու»ն, ըստ վերջին եօթը տարիներու աւանդութեան, այս թիւով մուտք կը գործէ իւրաքանչիւր հայ ընտանիքէ ներս, բոլոր հայ աշակերտներուն մաղթելով բարի վերամուտ եւ բարեյաջող ուսումնական տարի:

Սակայն, այս տարի Կիպրահայ գաղութի կեանքի իրականութեան մէջ, վերամուտին առիթով կար ուրիշ նորութիւն մը: Երկուշաբթի, 2 Սեպտեմբեր 2013-ին, առաջին անգամ ըլլալով իր դռները բացաւ «ՆԱՆՕՐ» Հայկական Մանկական Կեդրոնը, Նիկոսիոյ Նարեկ Վարժարանի շրջափակէն ներս, տաքուկ մթնոլորտի մէջ ընդունելով մեր գաղութի նորածիններն ու փոքրիկները: Երիտասարդ ծնողներուն դրսեւորած դրական արտայայտութիւնն ու գոհունակութիւնը, ինչպէս նաեւ գաղութին ընկալումը այս անհրաժեշտ կառոյցի ստեղծման առիթով զգալի է: Ուրախ են յայտնելու, թէ այս ոչ հասութաբեր հաստատութիւնը, յաջողութեամբ սկիզբ առաւ եւ օր ըստ օրէ ամուր հիմքերով կը շարունակէ ծառայել իր ազնիւ նպատակին: «ՆԱՆՕՐ» Հայկական Մանկական Կեդրոնին մասին յաւելեալ տեղեկութիւններով անդրադարձ կատարած ենք «Լրատու»ի յաջորդող էջերուն մէջ:

Իսկ Նարեկ Վարժարաններու 2013-ի շրջանաւարտները, ընկերակցութեամբ երկու ուսուցչուհիներու, Յուլիս

14–27 Հայաստան մեկնեցան երկու շաբթուան համար: Անոնք Կիպրոս վերադարձան յիշատակելի տպավորութիւններով: Այս մասին անդրադարձած ենք «Լրատու»ի թիւ 3-րդ էջով:

Գալով «ՆԱՆՕՐ» Մանկապատանեկան Պարախումբին, Շաբաթ, 5 Հոկտեմբերին, կանոնաւոր կերպով վերսկսան պարախումբին փորձերը, ղեկավարութեամբ հայրենի պարուսոյց Պրն. Պետրոս Ղարիպեանի, Նիկոսիոյ Նարեկ Վարժարանի սրահէն ներս:

Ինչպէս գիտէք, Երեսփոխանական Գրասենեակը իր տարեկան Կիպրոս–Հայաստան մշակութային յարաբերութեան ծիրէն ներս, Հայրենի «Ժողովրդական Երգիչ» նախագիծի ամենալաւագոյն երգիչ-երգչուհիները հրաւիրած է Կիպրոս, միայն մէկ ելոյթի համար, որ տեղի պիտի ունենայ Շաբաթ, 9 Նոյեմբեր 2013-ին, Ստրովոլոսի Քաղաքապետարանի սրահին մէջ, երեկոյեան ժամը 19:00-ին: Կոչ կ'ուղղենք գաղութի բոլոր անդամներուն եւ մեր հայրենակիցներուն, անվարանօրէն ներկայ գտնուելու այս իւրայատուկ հայկական ժողովրդական երգերու համերգին եւ իրենց ներկայութեամբ քաջալերելու հայ երգը մաքուր պահող եւ տարածող արուեստագէտները: Մի կորսնցնէք այս բացառիկ առիթը. կը վստահեցնենք ձեզի, թէ պիտի ապրիք անզուգական երեկոյ մը: Ներփակուած պիտի գտնէք այս առիթով լոյս տեսած թերթիկը:

Նախօրօք շնորհակալութիւն հայ արուեստասէրներուն եւ փառք ու պատիւ հայ մշակոյթը վառ պահողներուն:

Վարդէս Մահտեսեան

Կիպրահայ Համայնքի Պետական Ներկայացուցիչ

ԵՌԱՄՍԵԱՅ ԳՈՐԾՈՒՆԵՈՒԹԻՒՆ

ԵՌԱՄՍԵԱՅ ԳՈՐԾՈՒՆԵՈՒԹԻՒՆ

«Լրատու»ի նախորդ թիւով, Կիպրոս ժամանակաւոր կամ մշտական բնակութիւն հաստատած մեր հայրենակիցներուն տեղեկացուցած էինք երկրէն ներս տիրող տընտեսական ճգնաժամին պատճառով օրէնքի սահմանափակումներուն մասին, ինչ կը վերաբերի աշխատանքի հրամաններուն եւ արտօնագիրներուն:

Կացութիւնը կը շարունակուի ու ալ աւելի կը խստանայ, հետեւաբար, կը թելադրենք մեր հայրենակիցներուն, որոնք աշխատանք չունին եւ վերջին տարիներուն անօրէն կը մնան Կիպրոս կամ քաղաքական ապաստանեալի կարգավիճակ ունին եւ մերժում ստացած են, պէտք եղած կարգադրութիւնները ընել հեռանալու երկրէն, ապագային անհաճոյ կացութիւններու դիմաց չգտնուելու համար: Իսկ անոնք, որոնք վերջերս մերժում ստացած են, հակառակ այն իրողութեան, որ իրենց երկարատեւ կեցութեան ընթացքին Կիպրոսի մէջ անօրէն չեն մնացած եւ ունին աշխատանքի հրաման, Երեսփոխանական Գրասենեակը փորձ մը եւս կը կատարէ դիմելու Ներքին Գործոց Նախարարութեան, վերատեսութեան ենթարկելու անոնց պարագան:

Նարեկ Հայկական Վարժարաններու 2013

տարեշրջանի շրջանաւարտներուն Հայաստան այց

Կիրակի, 14 Յունիս 2013-ին, չորրորդ յաջորդական տարին ըլլալով, Նարեկ Հայկական Վարժարաններու շրջանաւարտները ընկերակցութեամբ երկու ուսուցչուհիներու՝ Տիկին Անկէլա Սավայի եւ Օրիորդ Նորա Նաճարեանի, երկու շաբթուան համար մեկնեցան Հայաստան: Ըստ աւան-

դուքեան, այս շրջապտոյտը Պրն. Մահտեսեանին նուէրն է շրջանաւարտներուն, որ կ'իրականանայ Հայաստանի Հանրապետութեան Սփիւռքի Նախարարութեան «Արի Տուն» ծրագիրի ծիրէն ներս:



Ինչպես միշտ, այս տարուան խումբն ալ մեծ խանդավառութեամբ եւ յիշատակելի տպաւորութիւններով վերադարձաւ Կիպրոս: Ըստ ընկերակցող ուսուցչուհիներուն, որոնք Չայաստանէն վերադարձին հանդիպում մը ունեցան Պրն. Մահտեսեանին հետ իրենց երախտագիտութիւնը յայտնելու, փոխանցեցին թէ «Արի Տուն» ծրագրի յայտագիրը ճոխ եւ բծախնդրութեամբ պատրաստուած էր: Յիշենք, թէ ինչպէս անցեալ տարի, այս տարուան մասնակցողներն ալ, ընկերակցութեամբ հիւրընկալող ընտանիքի իրենց տարեկից բարեկամներուն, երկրորդ շաբաթը միասնաբար անցուցին Աղաւնաձորի ճամբարին մէջ:

«ՆԱՆՕՐ» Հայկական Մանկական Կեդրոն



Երկուշաբթի, 2 Սեպտեմբեր 2013-ին, առաւօտեան ժամը 7:00ին, առաջին անգամ ըլլալով, իր դռները բացաւ «ՆԱՆՕՐ» Հայկական Մանկական Կեդրոնը՝ Նիկոսիոյ Նարեկ Վարժարանի շրջափակէն ներս:

Շուրջ տարի մը տեւած շինարարական, ներքին կահաւորման եւ վարչական աշխատանքները աւարտած ըլլալով, այս անհրաժեշտ հաստատութեան ստեղծումը, վերջապէս իրականութիւն դարձաւ Կիպրահայ գաղութի կեանքէն ներս: Ձեռնտու դրութիւն մը թէ՛ ծնողներուն եւ թէ՛ փոքրիկներուն համար, որ անկասկած պիտի նպաստէ նաեւ մեր գաղութի հայապահպանման նպատակին:

Կեդրոնը կը գործէ առաւօտեան ժամը 7:00-էն մինչեւ երեկոյեան ժամը 6:00-ը, հոգածութեան տակ ունենալով 4 ամսականէն մինչեւ 3 տարեկան երեխաներ: Առ այժմ, Կեդրոնը ունի 14 երեխաներ, մասնագիտացած 2 լիաժամ եւ 2 մասնաժամ ուսուցչուհիներով:



Ուրախութեամբ կը փոխանցենք, որ երիտասարդ ծնողներ, ականատես ըլլալով Մանկական Կեդրոնին իւրայատուկ հոգածութեան պայմաններուն եւ ջերմ մթնոլորտին, բարձր կը գնահատեն այս հայանպաստ նախաձեռնութիւնը. արդէն իսկ Կեդրոնը ունի նորածին երեխաներու սպասողական ցանկ մը:



«ՆԱՆՕՐ» Հայկական Մանկական Կեդրոնը ոչ հասութաբեր հաստատութիւն մըն է եւ կը կառավարուի հինգ հոգինոց նշանակուած Վարչական Խորհուրդի մը կողմէ:

ՀՀ Ընդհանուր Ղատախազութեան պատուիրակութեան այց

Չորեքշաբթի, 11 Սեպտեմբեր 2013-ին, Հայաստանի Հանրապետութեան Ընդհանուր Ղատախազութեան Միջազգային եւ Օրինական Հարցերու բաժանմունքէն պատուիրակութիւն մը, մէկ շաբթուան համար այցելեց Կիպրոս, տեսակցութիւններ ունենալու եւ առկախ մնացած հարցերը կարգաւորելու՝ Կիպրոսի Հանրապետութեան Տնտեսական Յանցագործութեան Քննութեան Գրասենեակին հետ: Այս պատուիրակութեան Երեսփոխանական Գրասենեակը լրիւ աջակցութիւն ցուցաբերեց, գոհացում տալով անոնց կարիքներուն, յաջողութեամբ աւարտելու իրենց աշխատանքային այցը Կիպրոս: Պատուիրակութիւնը, Երեքշաբթի, 17 Սեպտեմբերի երեկոյեան, հիւրընկալուեցաւ Պետա-

կան Ներկայացուցիչին բնակարանը:

Կիպրահայ գաղութի կեանքէն

Կիրակի, 18 Օգոստոս 2013-ին, Պետական Ներկայացուցիչն ու տիկինը, ներկայ գտնուեցան ՀՀԴ Կիպրոսի Երիտասարդական Միութեան կազմակերպած 25-րդ բանակումին փակման առիթով կազմակերպուած հանդիսութեան, որ տեղի ունեցաւ Թրոտոսի Արեւոյշներու բանակավայրին մէջ:

Ուրբաթ, 17 Սեպտեմբեր 2013-ին, Տէր եւ Տիկին Վարդգէս Մահտեսեաններ ներկայ գտնուեցան ՏԻԿՕ կուսակցութեան նախագահ Մարիոս Կարոյեանի համակիրներու խմբակին կազմակերպած բաց զրոյցին, որ տեղի ունեցաւ Ազգային Առաջնորդարանի «Իւթիւճեան» սրահին մէջ:

Պաշտօնական մակարդակի հանդիպումներ եւ ձեռնարկներ



Չորեքշաբթի, 24 Յուլիս 2013-ին, Պետական Ներկայացուցիչը հանդիպում մը ունեցաւ Աշխատանքային եւ Ընկերային Ապահովագրութեան նորանշանակ Նախարար Տիկին Զէտա Էմիլիանիտուին հետ, երկրին դիմագրաւած տնտեսական դժուարութիւններուն, ինչպէս նաեւ Կիպրահայ գաղութը յուզող կարգ մը հարցերուն առնչութեամբ: Ան խոստացաւ իր կարելին ընել օգտակար հանդիսանալու Կիպրահայ գաղութին:

Կիրակի, 25 Սեպտեմբեր 2013-ին, Պրն. Վարդգէս Մահտեսեան, յատկապէս հրաւիրուելով, ներկայ գտնուեցաւ Ամերիկայի Միացեալ Նահանգներու Կիպրոս ժամանած Քարտինալ Գերաշնորհ Մարք Կարիքի ի պատիւ տրուած ընթրիքին, որ տեղի ունեցաւ Մարոնիթներու Արքեպիսկոպոսարանին մէջ, հովանաւորութեան Նորին Գերագանցութիւն Մարոնիթ Արքեպիսկոպոս Եուսէֆ Սուէյֆի:

Ցաւակցագիր

Չորեքշաբթի, 18 Սեպտեմբեր 2013-ին, Պետական Ներկայացուցիչը նախկին «Արեւիկ», այժմ «Արեւներ» համոյքի Գեղարուեստական Ղեկավար Արմէն Տիւանեանի անակնկալ ու վաղաժամ մահուան տխուր առիթով, ցաւակցագիր մը յղեց անոր տիկնոջ եւ հարազատներուն:

Շնորհաւորագիր


Չորեքշաբթի, 4 Սեպտեմբեր 2013-ին, Պրն. Վարդգէս Մահտեսեան յատուկ նամակ մը յղեց ՀՀ Սփիւռքի Նախարար Տիկին Հրանոյշ Յակոբեանին, շնորհաւորելով Սփիւռքի Նախարարութեան հնգամեայ յրելւեանը, մաղթելով նախարարութեան ու անձնակազմին ուժ եւ կորով, նոյն թափով շարունակելու եւ նորանոր ծրագիրներ կեանքի կոչելու՝ ամրապնդելու համար Հայրենք–Սփիւռք կապերը:

Հինգշաբթի, 5 Սեպտեմբեր 2013-ին, Պետական Ներկա-

յացուցիչը յատուկ գիրով մը, շնորհակալութիւն յայտնեց ՀՀԴ Եւրոպայի Հայ Դատի Յանձնախումբի Գրասենեակին ուղարկած յատուկ հրաւերին համար՝ մասնակցելու Եւրոպահայութեան երրորդ համագումարին: Ան շնորհաւորեց Յանձնախումբին տարած անսակարկ աշխատանքը, որ անպայման ճամբայ պիտի բանայ մեր Սուրբ Դատի արդար լուծման ու հատուցման, ինչպէս նաեւ Արցախի ժողովուրդին ազատ ինքնորոշման:

Շաբաթ, 21 Սեպտեմբեր 2013-ին, Պրն. Վարդգէս Մահտեսեան անհատական շնորհաւորագիրներ յղեց Հայաստանի Հանրապետութեան Նախագահ Ն.Վ. Սերժ Սարգսսեանին, Սփիւռքի Նախարար Տիկին Հրանոյշ Յակոբեանին եւ Յունաստանի ու Կիպրոսի Արտակարգ եւ Լիազօր Դեսպան Պրն. Գագիկ Ղալաչեանին՝ Հայաստանի Հանրապետութեան անկախութեան 22-րդ տարեդարձին առիթով, մաղթելով որ յաջորդող տարիները մեր Հայրենիքի, Լեռնային Ղարաբաղի եւ համայն հայութեան համար ըլլան անկիւնադարձային:

Երկուշաբթի, 23 Սեպտեմբեր 2013-ին, Պետական Ներկայացուցիչը շնորհաւորագիր մը յղեց Նարեկ Հայկական Վարժարաններու տնօրէնուհի Տիկին Վերա Թահնազեանին, «Մովսէս Խորենացի» շքանշանով պարգեւատրուելուն ուրախ առիթով, մաղթելով անոր արեւշատութիւն եւ յարատեւ վերելք:



«Ժողովրդական երգիչ» Հանոյթ

Միայն մէկ ելոյթ

Շաբաթ 9 Նոյեմբեր 2013 ժամը 19.00
Ստրովիլոսի Քաղաքապետարանի Սրահ Նիկոսիա

Մասնակցութեամբ՝
Հայրենի ժողովրդական երգիչ նախագիծի լաւագոյն երգիչներուն

Սեւակ Ամրոյեանի
Պետրոս Պետրոսեանի
Եւա Թաշճեանի
Լուսինէ Գասպարեանի
Մոնիքա Նազարեանի
եւ
Նուազախումբին

Ինչպէս նաեւ
Համազգայինի «Սիփան» Պարախումբին

Տոմսի սակ €10.00

Տոմսեր ապահովելու համար հեռաձայնել 22-454540

Երեսփոխանական Գրասենեակ

Թարմացնելու համար «Լրատու»ի
 հասցեացանկը, Կիպրահայ գաղութի
 անդամներին եւ մեր հայրենակիցներին կը
 խնդրուի կապ հաստատել Երեսփոխանական
 Գրասենեակին հետ հեռաձայնելով 22454540
 թիւին, ճշդելու համար բնակարաններու
 հասցէները եւ կամ տեղեակ պահելու այլ
 փոփոխութիւններու մասին:

Շնորհակալութիւն

«Ծանօթանանք Կիպրոսի Հանրապետութեան
 Օրէնքներուն» բաժինը լոյս պիտի տեսնէ
 «Լրատու»ի յաջորդ թիւով:

ԿԻՊՐԱՀԱՅ ՀԱՄԱՅՆՔԻ ՊԵՏԱԿԱՆ ՆԵՐԿԱՅԱՑՈՒՑԻՉԻ ԳՐԱՍԵՆԵԱԿ

Քաղաքական Գրասենեակ

9B & C Kastorias Street, Ayia Paraskevi, 2002 Strovolos
 Հեռախօս 22- 45 45 40, Հեռատիպ 22- 42 46 42
 Ել. Հասցէ office@armenianmp.com
 Ուտայնէջ՝ <http://www.armenianmp.com>

Խորհրդարանական Գրասենեակ

Office Δ-2-2, House of Representatives, 1402 Nicosia
 Հեռախօս 22- 40 72 02, Հեռատիպ 22- 40 74 42
 Ել. Հասցէ vmahdessian@parliament.cy